

KEPADA ANGGOTA IKHWAN

Saudara-saudara anggota Ikhwan:

Beberapa pengaduan dengan lisan dan tulisan telah disampaikan kepada kita mengatakan bahawa ada di antara anggota-anggota Ikhwan dengan menggunakan lencananya menari di pentas joget, minum minuman keras dan seumpamanya, sehingga ada di antara anggota-anggota yang cintakan Ikhwan meminta kebenaran supaya dibolehkan merampas *badge* atau lencana yang digunakan oleh anggota Ikhwan yang menaiki pentas joget itu.

Jika benar pengaduan-pengaduan itu sungguh mendukacitakan kerana rupanya anggota-anggota Ikhwan yang melakukan perbuatan itu tidak menepati janjinya bahawa ia taat kepada lima perkara yang dicantumkan sebagai syarat-syarat yang utama untuk menjadi anggota Ikhwan. Tiap-tiap anggota Ikhwan yang mengaku taat kepada lima perkara itu sudah sewajarnya insaf akan tanggungjawab dan pengakuannya dan janganlah hendaknya kerana perbutannya itu akan mencemarkan tujuan dan cita-cita Ikhwan. Kalau demikian sifat dan pengertiannya untuk memburukkan nama baik Ikhwan dan cita-cita baik Ikhwan, semolek-moleknya bagi mereka itu menyerahkan semula dengan sukarela lencananya dan Ikhwan insya-Allah akan membayar semula wang mereka itu sekiranya mereka tidak sanggup menuaikan janji dan ikrarnya akan taat kepada syarat-syarat Ikhwan.

Di sebalik itu ada pula tanggungjawab anggota-anggota Ikhwan kepada saudara-saudaranya yang dilihat membuat kelakuan itu iaitu hendaklah ia mendapatkan saudara-saudaranya itu dengan cara baik, dengan tutur kata yang baik dan lemah

lembut, menasihatkannya jangalah melakukan perbuatan itu dengan memakai lencana Ikhwan di tempat yang tidak munasabah, kerana nanti akan menimbulkan kata-kata yang tidak baik, yang akan dihadapkan kepada umumnya Ikhwan dan cita-cita Ikhwan yang mulia.

Di peringatkan bahawa tiap-tiap anggota Ikhwan mestilah taat kepada lima perkara:

1. Mengaku bahwasanya tidak ada yang disembah melainkan Allah dan Muhammad itu pesuruh Allah.
2. Mengerjakan suruhan-suruhan Allah dan menjauhkan tegahan-tegahannya.
3. Berbuat baik kepada tiap-tiap manusia
4. Berusaha menjalankan seruan-seruan agama di mana berada dan dengan sedaya upaya masing-masing.
5. Bersefahaman dan berkasih sayang di antara sekalian orang-orang Islam khususnya keluarga Ikhwan.

Di dalam pelaksanaan pengakuan itu maka dengan sendirinya anggota-anggota Ikhwan hendaklah menunaikan taat setianya kepada cita-cita itu dan sekiranya ia tidak sanggup dan tidak berupaya menuaikannya janganlah memasuki Ikhwan—itu lebih baik daripada mencemarkan nama baik dan kesempurnaan cita-cita Ikhwan itu.

Mudah-mudahan teguran dan peringatan ini di perhati dan di lihat dengan saksama—dipertahankan bersama kerana cita-cita Ikhwan itu adalah satu cita-cita yang disuruh dan dikehendaki oleh agama kita. Insaflah bahawa Ikhwan didirikan bukan kerana persahabatan untuk bermain-main, tetapi Ikhwan ditegakkan di atas asas

mempereratkan ukhuwah atau persaudaraan dalam Islam—ukhuwah dan persaudaraan Islam tidak dapat dilaksanakan selagi umatnya tidak menunaikan tanggungjawabnya kepada agamanya. Mudah-mudahan hal ini diperingati oleh anggota-anggota Ikhwan yang telah mendaftarkan dirinya dan oleh orang-orang yang akan memasukinya. Biar sedikit anggotanya tetapi dapat menunaikan tanggungjawabnya ada lebih baik daripada banyak tetapi mempermain-mainkan tujuan dan cita-cita Ikhwan.

* * *

Bagaimana mengikat persatuan

Telah umum di ketahui bahawa salah satu daripada asas yang utama bagi dilaksanakan oleh anggota-anggota Ikhwan ialah merapatkan ukhuwah Islamiyyah di antara anggota-anggotanya. Kerana merapatkan ukhuwah Islamiyyah itulah maka asas yang utama bagi Ikhwan ialah mengaku bahawa tidak ada Tuhan yang disembah melainkan Allah dan Muhammad Pesuruh Allah. Kepada Ikhwan barangsiapa mengucapkan kalimah tauhid dan menyebut Muhammad itu Rasul dan hamba Tuhan maka ia terlingkung dalam persaudaraan yang ditaja oleh Ikhwan.

Dengan pengertian ini jelas dan terang telah dikemukakan bahawa bagi Ikhwan tidak dikira adakah ia dari lingkungan-lingkungan orang yang berpegang kepada salah satu mazhab, ataupun kepada kepada lingkungan ahli golongan yang tidak bermazhab iaitu mereka yang berpegang kepada al-Qur'an, al-Sunnah dan Ijma' sahabat. Pengertian-pengertian atau fahaman-fahaman itu tinggallah kepada saudara-saudara masing-masing, tinggallah di dalam pengertian masing-masing dan di samping itu kami menyeru kepada anggota Ikhwan supaya bertanggung jawab di dalam merapatkan ukhuwah Islamiyyah itu.

Untuk itu bagi perhatian anggota Ikhwan suka kami mengambil ucapan yang diucapkan oleh Kiyai Muhammad Arsyad Thalib Lubis sedikit masa

dahulu yang menerangkan bahawa pokok untuk mengerakkan pengertian ukhuwah atau persaudaraan itu sudah ada dan dasar-dasarnya telah diajarkan oleh Tuhan. Tuhan, kata beliau, menganjurkan kepada kita iaitu dasar yang mestinya kita pegang dalam memperjuangkan persatuan kita, telah banyak ayat-ayatNya dan hadis-hadisnya yang tidak payah dihuraikan satu persatu.

Kalau Tuhan mengatakan berpeganglah dengan tali Allah iaitu agama Allah itu menjadi pokok maka yang demikian itu bukanlah bermakna bahawa kita tidak boleh berlainan pendapat dan pengertian dalam memahamkan sesuatu yang ada perselisihan di dalamnya. Di dalam agama Islam, katanya kita bebas mempunyai pendapat—tidak dikongkong oleh pendapat-pendapat itu. Islam tidak menghalangi orang-orang yang berfikir dengan berlainan faham dan berlainan pendapat itu. Faham dan pendapat itu tidak boleh di satukan.

Pada zaman sahabat juga, yakni pada zaman Nabi, sahabat-sahabatnya juga berlainan pendapat. Sebenarnya tujuannya bukannya pendapat itu yang harus disatukan, supaya serupa fahamnya, dalam memahamkan al-Quran dan al-Hadith kerana yang demikian itu tidak pernah terjadi, tidak pernah menjadi kenyataan, dan tidak pula dilarang.

Yang dilarang oleh agama Islam ialah berpecahbelah, yang di larang ialah tafriq dan **tanazi'**. Berlainan pendapat tetapi jangan berpecahbelah. Berlainan-berlainanlah pendapat tetapi jangan tafriq. Inilah yang dilarang bukan berlainan pendapat bahkan berlainan pendapat itu adalah satu rahmat.

Bukankah Islam itu memberikan kemerdekaan berfikir supaya umat Islam itu boleh tinggi fikirannya dan tinggi fahamnya dalam memahamkan sesuatu? kata Kiyai Arsyad lagi

Sebagai umat Islam adalah mustahak mencari titik persamaan dan janganlah mencari jalan dalam titik perbezaan. Dan dengan demikian ini sahajalah kita dapat

bersatu. Kalau kita masing-masing bertahan tidak mahu mencari titik persamaan dan berkeras mempertahankan pendirian masing-masing maka bilakah masanya kita boleh bersatu? Carilah persamaannya yang lebih banyak perkara-perkara yang sama itu daripada perkara-perkara yang tidak sama. Janganlah seseorang itu hendak menjajah orang lain dalam pengertiannya dan orang lain itu janganlah hendak menjajah pengertian seseorang itu—masing-masing hendaklah memberi pertunjuk dengan penerangan dengan keterangan masing-masing, dengan cara masing-masing tetapi janaganlah di sifatkan penerangan itu untuk menjajah orang lain.

Penyudahnya Kiyai Arsyad Thalib Lubis berharap, kiranya alim ulama kita di Malaya ini merenung semula hal-hal yang serupa ini dan merenungkan pula fikiran-fikiran tentang kitab-kitab hadis yang menunjukkan berlainan-berlainan pendapat tidak dilarang—dibolehkan. Berjalanlah mengikut keyakinan masing-masing dan ijtihad masing-masing, tetapi janganlah yang demikian itu membawa tafriq dan **tanazi'**—

Sekian pendapat Kiyai Arsyad Thalib Lubis itu.

Saudara-saudara anggota Ikhwan, kita percaya banyak yang hanya menjadi pengikut sahaja haruslah memerhatikan yang demikian ini, janganlah saudara terikut kepada cara-cara yang membawa kepada perpecahan. Janganlah saudara-saudara melupakan tanggung jawab saudara-saudara untuk menghormati faham dan pengertian, dan jauhkanlah daripada pengikut-pengikut yang mempertengkar perkara-perkara yang saudara sendiri tidak mengerti kedudukannya. Tinggalkanlah perselisihan pendapat itu kepada orang-orang yang mengerti sedang kepada saudara sangat-sangat dianjurkan supaya bertutur kata dengan baik, berbuat perbuatan yang baik, menjauhkan daripada sebaliknya, supaya menjadi contoh dan tauladan kepada yang lain. Tegurlah anggota Ikhwan yang telah lupa daratan yang melupakan tanggungjawabnya yang akan mencemarkan nama Ikhwan, dengan

cara yang baik, tauladan yang baik dan tutur kata yang baik, jangan dengan kekasaran. Insafkanlah mereka itu dengan kata-kata persaudaraan, dengan kalimah persaudaraan, dengan perasaan kasih sayang di antara satu dengan lain. Tunjukkanlah mereka dengan pertunjuk-pertunjuk yang baik dan kata-kata yang mulia mudah-mudahan mereka itu insaf, insaf akan tanggungjawabnya dan insaf supaya mereka berbalik kepada kebenaran, berbalik kepada menyeru berbuat baik dengan cara-cara yang baik. Janganlah sekali-kali, seboleh-bolehnya, saudara-saudara menyenggung perasaan atau peribadi mereka itu. Halus-haluslah pekerjaan saudara-saudara tatkala menjalankan tugas dan kewajipan sebagai anggota Ikhwan.

Kami pucuk pimpinan Ikhwan berharap dengan cara itulah saudara-saudara akan dapat melaksanakan cita-cita Ikhwan kerana kami di pucuk pimpinan tidak dapat menjumpai saudara-saudara satu persatu hanya kami menyeru sahaja dari sini, menyeru kepada tiap-tiap anggota Ikhwan bersama-sama mengambil berat, bersama-sama merasa bertanggung jawab menunaikan kewajipan yang telah ditanggungkan kepada saudara-saudara yang telah diakui untuk ditaati oleh saudara-saudara. Perbaikilah dahulu di antara kita sesama kita anggota Ikhwan supaya mereka insaf dan dengan keinsafan itulah nanti diharap Ikhwan akan merata di Semenanjung Tanah Melayu sebagai cita-cita yang akan menegakkan kalimah Tuhan yang Maha Tinggi. Inilah harapan kami pucuk pimpinan Ikhwan dan inilah juga yang diharap supaya di tunaikan dan di pertanggungjawabkan oleh tiap-tiap anggota Ikhwan. Mudah-mudahan Allah memberi taufik dan hidayah kepada kita menggerakkan hati kita bersama-sama mengabdikan diri kepada-Nya dan mudah-mudahan Tuhan menolong umat Islam, khususnya anggota Ikhwan, menyelenggarakan tujuan-tujuannya, dengan demikian cita-cita kita hendak menegakkan hukum dan ajaran Tuhan di dalam negeri ini berhasil hendaknya. Amin ya rabb al-ālamīn.